

PRIJEDLOG

Na osnovu člana 12. Zakona o javnom redu i miru (Službene novine Zeničko-dobojskog kantona, broj 8/00, 15/03,11/07, 8/08, 12/16, 4/17, 6/17), člana 7. Zakona o zaštiti od buke (Službene novine ZE-DO kantona, broj 2/08), člana 18. Statuta općine Maglaj (Službene novine broj 8/07, 3/08 i 6/08), na ____ sjednici, održanoj dana ____ . ____ . 2018. godine, Općinsko vijeće donosi:

Odluku o javnom redu i miru

I - OPĆE ODREDBE

Član 1.

Ovom odlukom uređuje se javni red i mir na području općine Maglaj, utvrđuju djela kojima se povređuje javni red i mir i propisuju prekršajne sankcije za postupke i ponašanja kojima se narušava i ugrožava sigurnost i lično dostojanstvo na javnim mjestima, mir i odmor građana u njihovim stanovima, vrijeđa moral, ometa rad organa vlasti i drugih pravnih lica, ugrožava opća sigurnost imovine, kao i druga djela kojima se narušava javni red i mir.

Član 2.

Pod javnim mjestom u smislu ove Odluke podrazumijeva se mjesto na koje je slobodan pristup neodređenom broju lica bez ikakvih uvjeta (ulice, trgovi, javni putevi, izletišta, čekaonice, ugostiteljske, trgovinske ili zanatske radnje, sredstva i objekti javnog prijevoza i slično) ili pod određenim uvjetima (sportski stadioni i igrališta, bioskopske, pozorišne i koncertne sale, izložbene prostorije i slično), kao i druga mjesta koja u određenom vremenskom periodu služe za ovakve svrhe (zemljišta ili prostorije u kojima se održavaju skupovi, takmičenja i slično).

Pod javnim mjestom smatra se i svako drugo mjesto dostupno vidiku sa javnog mjesta (balkon, terase, hodnici, dvorišta i slično) te stanovi u stambenim zgradama, kada se u njima ili iz njih narušava javni red i mir, u slučajevima posebno propisanim ovom Odlukom.

Član 3.

Pod očuvanjem javnog reda i mira podrazumijeva se i zaštita od buke. Zaštitu od buke osiguravaju i vlasnici izvora buke. Zaštita od buke provodi se danonoćno.

U smislu ove odluke u zimskom periodu dan traje od 06 do 22 h, a noć od 22 do 06 h, a u ljetnom periodu dan traje od 07 do 23 h, a noć od 23 do 07h.

Član 4.

Predviđeni nivoi buke ne smiju preći najviše dopušteni nivo buke utvrđen posebnim zakonom koji reguliše ovu oblast, a u skladu sa planiranim sadržajima i funkcijama u prostoru.

Član 5.

Zabranjeno je obavljati radove, odnosno djelatnosti koji zbog prekomjerne buke, uključujući i emitovanje muzike ometaju noćni mir i odmor u naseljenim mjestima, u vremenu od 22 do 06 h u zimskom periodu i od 23 do 07 h idućeg dana u ljetnom periodu.

Član 6.

Svaki građanin općine Maglaj ili druga lica koja na području općine Maglaj prikupljaju dobrovoljne priloge, moraju prethodno pribaviti saglasnost za obavljanje radnje prikupljanja prihoda od strane nadležne službe Općine Maglaj.

Član 7.

Pod prekršajima javnog reda i mira podrazumijeva se:

1. Guranje i ulaženje preko reda na ulazima u prodavnice, kulturne i sportske objekte, vozila javnog prijevoza, prostorije državnih organa, javne ustanove i preduzeća, druge organizacije.

Na mjestima iz prethodnog stava, građani su dužni da poštuju red i da prednost daju težim invalidima, trudnicama, licima nemoćnim zbog bolesti ili starosti, slijepih lica i njihovim pratiocima, pratiocima djece do sedam godina starosti.

Licima iz prethodnog stava mora se dati prednost i pri kupovini ulaznica za javne skupove i manifestacije.

Na mjestima iz stava 1 građani su dužni poštovati i kućni red utvrđen od strane nadležnog organa.

2. Preskakanje zidova, ograda, ulasci kroz prozor radi ulaska u prostorije ili mjesta gdje se održavaju zabavni programi, sportski, kulturni i drugi javni skupovi.

3. Kupanje na rijekama i drugim tekućim vodama, osim na mjestima koja je odredio nadležni organ.

Na rijekama i drugim tekućim vodama na kojima postoji status javnog kupališta, utvrđen od nadležnog organa i bazenima, zabranjeno je svako uznemiravanje kupača prskanjem, stvaranjem prekomjerne buke, neopreznom zabavom potapanja drugog, ometanjem u plivanju i drugim radnjama kojima mogu da se ugroze sigurnost i životi kupača.

4. Ležanje, spavanje na ulici, trgu, klupama, parkovima, propustima, čekaonicama, mostovima i slično.

5. Pretovar, utovar, istovar i rukovanje predmetima na javnim mjestima koji se vrši na način da se stvara buka koja uznemirava ili ometa građane.

6. Zadržavanje i boravak lica u napuštenim državnim, javnim, vjerskim i privatnim objektima, kao i ruševnim objektima.

7. Uznemiravanje u javnim lokalima, na zborovima i drugim organizovanim i uobičajenim skupovima, na igrankama, sportskim takmičenjima, vjerskim skupovima i drugim manifestacijama, sredstvima namijenjenim za prijevoz putnika u javnom saobraćaju kao i na drugim sličnim mjestima, nošenjem noža, sjekire, izvijača, pračke kao i drugih predmeta namijenjenih za upotrebu u domaćinstvu, zanastvu, poljoprivredi i sportu, a koji su podesni za nanošenje tjelesnih povreda.

Na mjestima iz prethodnog stava, zabranjeno je nošenje štapa, metalne šipke kao i drugih predmeta od tvrdog materijala (kamen, željezo i slično), koji su podesni za nanošenje tjelesnih povreda.

Kada se predmeti iz stava 1 i 2 nose na navedenim mjestima smatrat će se kao i hladno oružje u smislu odredbi Zakona o nabavljanju, držanju i nošenju oružja i municije.

8. Prodaja, točenje i upotreba alkoholnih pića na mjesnim igrankama, javnim sijelima, javnim skupovima, ispred ugostiteljskih objekata i drugim javnim mjestima.

9. Loženje vatre na površinama prilikom čišćenja bašta i njiva, a pri tome spaljivanje neekološkog i zagađujućeg materijala (guma, plastika i slično).

10. Nedoovoljeno korištenje javne površine bez odobrenja nadležnog organa.

11. Neovlašteno izvođenje radova na instalacijama i postavljanje ili provlačenje novih instalacija u stambenim zgradama za čije je izvođenje potrebno odobrenje ili saglasnost nadležnog organa.

12. Uznemiravanje stanara upotrebom telefona, zvonceta ili interfona ili kucanjem na vrata stana bez potrebe, kao i prodaje robe, gatanja ili poricanja sudbine ili pružanja usluga koje nisu ugovorene ili naručene.

13. Kada lice u svojstvu vlasnika ili zakupca stambenog objekta, porodične zgrade, zgrade kolektivnog stanovanja i poslovnog objekta iste drži nečistim i zapuštenim kao i pripadajuće ili dijelove trotoara, ulaza i prilaza u objekte.

14. Kada se u dane praznika i dana opće žalosti, proglašanih od zvaničnih državnih organa, organizuje na propisan način obilježavanje isticanjem zastava, plakata, panoa, reklamnih sredstava, a isti se skidaju, uništavaju ili čini manje vidljivim.

15. Ko vrši uznemiravanje građana pisanjem uznemirujućih ili prijetećih SMS poruka putem telefona koje koristi lice koje se može identificirati, pisanjem uznemirujućih i prijetećih poruka, komentara kojim se narušava javni red i mir osobe kojoj se upućuju komentari, putem elektronske pošte, na društvenim mrežama i na javnim portalima koji služe kao javni servis građanima u pružanju informacija koje koristi lice koje se može identificirati.

16. Ko vrši postavljanje raznih plakata i drugih oglasa na mjestima gdje to nije predviđeno, posebice pisanje oglašavanja bojama po zidnim površinama, ko postavlja reklame bez odobrenja nadležnog općinskog organa ili tijela.

17. Postupanje sa životinjama na način koji izaziva uznemiravanje i negodovanje građana:

- a) puštanje i vođenje psa na javnom mjestu bez zaštitne korpice na njušci i bez povodca
- b) držanje opasnih životinja na način kojim se može ugroziti život i zdravlje građana
- c) držanje životinja u naseljenom mjestu koje remete noćni mir građana
- d) surovo postupanje sa životinjama na javnom mjestu, podstrekavanje na borbu i izazivanje životinja

18. Upotreba aparata, muzičkih instrumenata sa pojačanjem zvuka u naselju na otvorenom prostoru bez pribavljanja odobrenja.

19. Prskanje prolaznika vodom prilikom pranja vozila, ulica, dvorišta i zalijevanja vrtova i travnjaka te prskanje pješaka prilikom upravljanja vozilom.

20. Bacanje leda i snijega u grudvama na prolaznike i automobile, bacanje kamenja ili drugih predmeta, kao i bacanje iz zgrada ili ograđenih prostora predmeta i smeća.

21. Pisanje i isticanje grafita po objektima bez saglasnosti vlasnika i drugim javnim površinama, lomljenje sadnica i rasada te vršenje fiziološke potrebe na mjestima koja za to nisu predviđena.

22. Stvaranje nepotrebne buke prijevozom, utovarom ili istovarom pojedinih vrsta robe ili smeća, siječenje drva ili drugih drvenih ili metalnih predmeta u vremenu od 16.00-19.00h i od 22.00-07.00 h.

23. Izvođenje muzike uživo i upotreba uređaja za reprodukciju muzike u ugostiteljskim objektima:

a) u zatvorenom prostoru u ugostiteljskim objektima koji se nalaze u stambeno-poslovnim zgradama ili njihovoj neposrednoj blizini od 23.00-06.00 h, izuzev u dane vikenda (petak i subota), kao i u dane praznika, kada je dozvoljeno korištenje reprodukovane i žive muzike u trajanju do 01,00 sat, uz podnošenja zahtjeva nadležnoj općinskoj službi i prilaganje uplatnice o izvršenoj uplati administrativne takse u skladu sa općinskom Odlukom o administrativnim taksama.

b) u baštama ugostiteljskih objekata koji se nalaze u stambeno-poslovnim zgradama ili njihovoj neposrednoj blizini od 23 do 06 h, a uz upotrebu pojačala zvuka od 22 do 06h,

c) u ugostiteljskim objektima koji se ne nalaze u stambeno-poslovnim zgradama ili njihovoj neposrednoj blizini u zatvorenim prostorima od 23 do 06 h, a u baštama tih objekata uz upotrebu pojačala zvuka od 22 do 06h,

24. Pomjiranje posuda za smeće sa mjesta koja su utvrđena odlukom nadležnog organa, odlaganje smeća izvan kontejnera, paljenje vatre u i oko kontejnera, oštećenje kontejnera, kao i oštećenje klupa po parkovima, šetalištima i drugim javnim površinama.

25. Izbacivanje otpadaka iz motornog vozila u pokretu na javne i druge površine.

26. Uništavanje cvijeća, ukrasnog grmlja i drveća, kao i cvijeća položenog u znak porodičnih pomena na groblju, spomenicima i drugim objektima slične namjene.

27. Uvođenje ili omogućavanje uvođenja bilo koje životinje u ugostiteljski objekat ili drugi javni objekat.

28. Stavljanje na zidove zgrada, ispred zgrada i ograde predmeta koji mogu povrijediti ili uprljati prolaznike, kao i bacanje flaša, čaša, smeća i sličnih predmeta na javne površine.

29. Namjerno paljenje smeća u kontejnerima u gradu i drugim naseljenim mjestima.

30. Pranje motornih vozila, prosipanje motornog ulja na mjestima gdje to nije predviđeno i pranje tepiha i drugih stvari ispred zgrada i na drugim mjestima gdje to nije predviđeno.

31. Neovlašteno uklanjanje zaštite na otvorima za vodovod i kanalizaciju (šahtovi) ili ko ih od ovlaštenih radnika nakon izvršenog pregleda ne vraća na svoje mjesto, čime se dovode u opasnost građani (prolaznici).

32. Nepoštivanje odluke o kućnom redu u stambenim, školskim, zdravstvenim i drugim institucijama, sjedenje u stubištima ulaza u zgradu kao i korištenje ivice trotoara za sjedenje .

33. Unošenje alkoholnog pića od strane pojedinaca u ustanove i sportske objekte za vrijeme održavanja sportskih i kulturnih manifestacija, a naročito zabrana konzumiranja alkoholnih pića ispred prodavnica i prodaja alkoholnih pića od strane organizatora.

34. Nepridržavanje uputa i naređenja redara na stadionima i drugim mjestima prilikom sportskih i drugih manifestacija i ko ulazi u te prostore mimo određenog mjesta ulaza preko ograde.

35. Prodaja robe i pružanje usluga na javnim površinama, prodaja robe na trotoarima bez pribavljenog odobrenja nadležnog općinskog organa.

36. Ljepljenje parola, plakata, reklama i drugo na mjestima koja za to nisu određena, a naročito ako su u pitanju tekstovi provokativnog karaktera.

37. Namjerno zatrpavanje kanala za odvodnju površinskih voda.

Član 8.

Općinski načelnik može donijeti Odluku o produženju radnog vremena ugostiteljskih i drugih objekata i u ostalim danima, a na osnovu ukazane potrebe (npr. Studentsko ljeto i neke druge manifestacije).

II – KAZNENE ODREDBE

Član 9.

Za prekršaje iz člana 7, tačka 1, 2, 3, 4, 5, 6, 8, 9, 10, 11, 12, 13, 19, 20, 22, 24, 25, 26, 27, 28, 29, 30, 31, 32, 33, 34, 36, 37, , određuje se novčana kazna u iznosu od 100,00 KM.

Za prekršaje iz člana 7, tačka 14, 15, 16, 18, 21, 34 i 35, određuje se novčana kazna u iznosu od 200,00 KM.

Za teže prekršaje fizičkim licima iz čl. 7. tačka 7. određuje se novčana kazna u iznosu od 200,00 – 500,00 KM.

Za prekršaje iz čl.7. tačka 23. Ove Odluke određuje se novčana kazna za:

pravna lica u iznosu od 500,00 – 3.000,00 KM.

odgovorna lice u pravnom licu u iznosu od 200,00 KM – 500,00 KM.

Član 11.

Nadzor nad sprovođenjem odredaba ove Odluke u okviru svoje nadležnosti vrše inspekcijski organi i nadležno Ministarstvo unutrašnjih poslova u okviru svoje nadležnosti.

Nadzor nad primjenom odredbi koje se odnose na buku u periodu od 22 do 06h u zimskom periodu i od 23 do 07 h u ljetnom periodu vrši nadležna policijska uprava MUP-a ZDK, u skladu sa zakonom.

Član 12.

Kada službenici policije u vršenju službenih poslova i zadataka saznaju za prekršaj propisan ovom Odlukom, mogu privremeno oduzeti predmete koji su upotrijebljeni ili su bili namijenjeni za izvršavanje prekršaja, kao i predmete koji mogu poslužiti kao dokaz u prekršajnom osnovu.

U slučaju da nadležni organ nadzora utvrdi kontinuirano u određenom vremenskom periodu kršenje odredbi ove Odluke, a koje se odnose na stvaranje buke, dužni su po službenoj dužnosti zahtjevati inspekcijski nadzor prema pravnom ili fizičkom licu koje je izvor buke, bez obzira na broj prethodno izrečenih prekršajnih mjera.

III – PRIJELAZNE I ZAVRŠNE ODREDBE

Član 13.

Ova Odluka stupa na snagu osmog dana od dana objavljivanja u Službenom glasniku općine Maglaj.

Broj:

PREDSJEDAVAJUĆA OV

Datum: . .2018. godine

Svjetlana Zamboni

OBRAZLOŽENJE

Nacrt Odluke o javnom redu i miru sačinjen je na osnovu člana 12. Zakona o javnom redu i miru – (Službene novine ZE-DO kantona, broj 8/00, 15/03,11/07, 8/08, 12/16, 4/17, 6/17), člana 7 Zakona o zaštiti od buke (Službene novine ZE-DO kantona, broj 2/08), I člana 18 Statuta općine Maglaj (Službene novine broj 8/07, 3/08 i 6/08).

Zbog čestog remećenja javnog reda i mira od strane ugostiteljskih objekata, puštanje glasne muzike do kasno u noć i drugih načina ometanja građana općine Maglaj na javnim mjestima i u njihovim domovima, ukazana je potreba za donošenje Odluke o javnom redu i miru, kako bi policijski službenici općine lakše vršili kontrolu sprovođenja javnog reda i mira.

Prvobitno, Nacrt Odluke o javnom redu i miru bio je razmatran na sjednici Foruma za bezbjednost građana općine Maglaj održanoj 27.09.2017. godine, nakon čega je usaglašeno od strane predsjedavajućeg Općinskog vijeća, gospodina Ferić Hajrudina i policijskih službenika Policijske stanice Maglaj da Nacrt Odluke o javnom redu i miru treba dopuniti određenim sugestijama.

Obzirom na odlučeno, održano je nekoliko sastanaka sa predsjedavajućim Općinskog vijeća Maglaj i policijskim službenicima, uvrštene su sve sugestije od navedenih što je u konačnici rezultiralo izradom dopunjenog nacrtu navedene odluke.

Nacrt Odluke je dostavljen na sjednicu Općinskog vijeća koja je održana dana 30.01.2018. godine, kada je donesen Zaključak broj 02-05-1-217/18 od 30.01.2018. godine, kojim se usvaja Nacrt Odluke o javnom redu i miru, i otvara javna rasprava u trajanju od 60 dana.

Javna rasprava na Nacrt Odluke o javnom redu i miru je održana dana 12.03.2018. godine, gdje su bili prisutni vlasnici ugostiteljskih objekata na području općine Maglaj.

Primjedbe i prijedlozi sa javne rasprave su konstatovani na Zapisniku broj 01-49-476/18-1 od 12.03.2018. godine (koji je u prilogu ovog Prijedloga Odluke).

Primjedbe i prijedlozi na Nacrt Odluke su mogli biti dostavljeni u roku od sedam dana od dana održavanja javne rasprave, kada su isti dostavljeni od strane Grupe vlasnika ugostiteljskih objekata na području općine Maglaj, koje dostavljamo u prilogu Prijedloga Odluke.

Primjedbe i prijedlozi Grupe vlasnika ugostiteljskih objekata na području općine Maglaj se odnose na član 7. Stav 28. Odluke gdje predlažu da se korištenje reproduktivne i žive muzike u ugostiteljskim objektima u dane vikenda (petak i subota), kao i dane praznika traje do 01,00 sati.

Primjedbe i prijedlozi vlasnika ugostiteljskih objekata su u prilogu prijedloga Odluke.

Javna rasprava na Nacrt navedene Odluke je održana ponovno dana 28.03.2018. godine, kada je donesen zaključak da se ponovno za 10 dana održi javna rasprava.

Javna rasprava je održana dana 25.04.2018. godine kada je od strane predstavnika PS Maglaj predloženo da se urede kaznene odredbe koje se odnose na član 8. i 9. Nacrta Odluke.

Takođe je predloženo da se uredi preambula Nacrta odluke te da se izbrišu tačke iz člana 7. Nacrta odluke koje se ponavljaju.

Sve primjedbe i prijedlozi su uvršteni u Prijedlog Odluke o javnom redu i miru.

Zbog svega navedenog predlaže se Općinskom vijeću da usvoji Prijedlog Odluke o javnom redu i miru .

OBRADIVAČ: Saračević Jasminka dipl.pравnik



KONTROLOR: Fuad Hajrulahović dipl. ing. arh.



Općinski načelnik

Mirsad Mahmutagić



Grupa vlasnika ugostiteljskih objekata
na području općine Maglaj

FEDERACIJA BOSNE I HERCEGOVINE
OPĆINA MAGLAJ
Služba za borbu protiv invalidnosti i socijalnu zaštitu
opću pravu i društvene djelatnosti

| | |
|-----------|------------|
| PRIMLJENO | 15.03.2018 |
| Općina | |
| | 2292 |
| | |

KOMISIJA ZA IZRADU NOVE
ODLUKE O JAVNOM REDU I MIRU
NA PODRUČJU OPĆINE MAGLAJ

Izmjene odredbi u
Nacrtu Odluke o javnom redu i miru na području općine Maglaj

Ovim putem grupa vlasnika ugostiteljskih objekata na području općine Maglaj daje primjedbe na predloženi Nacrt Odluke o javnom redu i miru na području općine Maglaj, koja je bila na Javnoj raspravi dana 12.03.2018. godine u sali Općinskog vijeća Maglaj.

Naš stav je da predložene odredbe Nacrta Odluke, u članu 7. stav 28. ne mogu se prihvatiti ukoliko se ne uvaži naš prijedlog, a to je da se u stavu 28. doda nova alineja, koja bi glasila:

d) Korištenje reprodukovane i žive muzike u ugostiteljskim objektima u dane vikenda (petak i subota) kao i u dane praznika traje do 01,00 sat“.

Ukoliko smatrate da je naš prijedlog neprihvatljiv, onda je naš stav da se u članu 7. stav 21. i 28. brišu iz predložene Odluke i da se radno vrijeme i korištenje reprodukovane i žive muzike u ugostiteljskim objektima tretira posebno kroz novu Odluku o radnom vremenu u određenim djelatnostima na području općine Maglaj.

Kada je riječ o primjeni odredbi Zakona o zaštiti od buke, što je bila tema razgovora na Javnoj raspravi, to je u nadležnosti općinske, kantonalne i federalne turističko-ugostiteljske inspekcije i drugih nadležnih inspekcija, i mi kao vlasnici ugostiteljskih objekata smo izloženi njihovoj redovnoj kontroli.

Maglaj 14.03.2018.g.

Restoran "ROVA"
vl. Hodžić Ernest
Tel.: 032 699 435 - MAGLAJ
Juni
Sala bar i Disco klub
WINNER CLUB
Maglaj
Halvedžo Sabina
Maglaj

Broj: 01-49- 476/18-A

Z A P I S N I K

sa održane javne rasprave na Nacrt Odluke o javnom redu i miru na području Općine Maglaj.

Javna rasprava je održana u Sali Općinskog vijeća Maglaj dana 12.03.2018.godine sa početkom u 11,00 sati.

Prisutni:

.Predstavnici Službe za urbanizam,geodetske i imovinsko pravne poslove:
Saračević Jasminka Stručni savjetnik za upravno rješavanje i Hadžić Aida,volonter

.Hodžić Emir vlasnik Boulevard,Alen Husaković i Mirza Halvedžić vlasnici New Winner Club,Senad Suljaković vlasnik Piccadilly,Mehinagić Muhamed vlasnik Retra,Musaefendić Dejan vlasnik caffe bar M,Fermić Hajrudin član mješovite radne grupe.

Javnu raspravu je otvorila Saračević Jasminka Stručni savjetnik u Službi za urbanizam,geodetske i imovinsko pravne poslove i upoznala prisutne o osnovu donošenja Odluke o javnom redu i miru na području Općine Maglaj.Najviše se dotakla članova 1,3,5 koji se najviše tiču prisutne i detaljno objasnila svaki član kako bi prisutni mogli da se bolje upoznaju sa ovom Odlukom.

Nakon toga je otvorena javna rasprava.

Hajrudin Fermić član mješovite radne grupe je malo detaljnije uveo prisutne šta tačno ova Odluka znači,istakao je da treba da postoji primjena Zakona o javnom redu i miru gdje se dotakao toga da Općinsko vijeće treba da izvrši izmjenu i dopunu ove Odluke ili da donese novu Odluku o javnom redu i miru i da se ta Odluka malo više precizira.Također je naveo da se u ovoj Odluci najviše bili prijedlozi i sugestije Policijske uprave gdje je konstatovao da se niko od njih nije pojavio kako bi dali bilo kakav odgovor koji bi vi mogli postaviti. Senad Suljaković je izjavio da ima Odluka iz 2009.godine koja je jasna i koja je jako precizirana što se tiče nas ugostitelja.Moj najveći problem je radno vrijeme jer smatram da ako se ovakva Odluka usvoji da će mnogi ugostitelji morati da zatvore svoje lokale, i smatram da to nije dobro za našu djecu.Ja sam za to da produži radno vrijeme barem vikendom jer kod nas radnim danima i nema muzike,također smatram da i kazne su jako velike ako ko prekrši ove odredbe.Smatram da Policijska uprava nije ove primjedbe iznosila objektivno jer je više gledalo svoju korist,a njihovo ne pojavljivanje na javnoj raspravi govori mnogo toga jer nama trebaju odogovori.Pitam se ja šta će biti sa Studenskim ljetom ako budemo imali ograničeno radno vrijeme,ja ponavljam da meni niko nije došao da izmjeri buku i ako to trebam da ugradim onda ću to i uraditi.

Hajrudin Fermić je konstatovao i rekao da što se tiče njega da se ova Odluka može skinuti i njeni članovi ali da opet neće nestati problem koji postoje,također je rekao da su ovo prijedlozi Policijske uprave i da se trebaju njima obratiti da Općinsko vijeće ne može puno toga tu uraditi.

Fehrat Bradarić jedan od predstavnika Službe za privredu,finansije i razvoj poduzetništva je istakao sljedeće da Odluka o radu ugostiteljskih objekata mora biti usklađena sa ovom

Odlukom, naš je stav da se produži radno vrijeme ugostiteljskih objekata jer ako želimo da zadržimo tu praksu treba da se izmijeni član 28 ili da se ukine, jer ako se usvoji ovakva Odluka mi ćemo morati da radimo po tim propisima. Što se tiče člana 7. stav 7. sugerisem da bude malo više precizniji i jasniji najviše se tiče poljoprivrednika kako ne bi doveli u zabunu građane i da ne bi neko iskorištavao na pogrešan način ovaj član. Članovi 16, 20, 25, 21, 28, 22, 31, 35 su također loše definisani i da se trebaju drugačije rečenice formulisati kako ne bi došlo do zabune.

Hajrudin Ferić se pozvao na Zakon o zaštiti od buke navodeći da ugostiteljski objekti trebaju da imaju uslove za puštanje muzike.

Gdje je Musaefendić Dejan i Senad Suljaković su izjavili da oni imaju takve uslove i da ako i nemaju da bi ih riješili. Da im je data upotrebna dozvola i samim time da imaju ispunjene uslove.

Senad Suljaković je rekao da on pošuje svaku Odluku koja se donjela ali da ova treba stvarno izmjene oko radnog vremena i muzike.

Fehrat Bradarić je istako da inače Noćni barovi, Noćni klubovi, Disko Barovi, Disko Klubovi imaju pravo da drže stalno muziku uživo mada se može izvršiti i restrukcija na druge djelatnosti.

Hajrudin Ferić je istakao da se ne može donjeti Odluke mimo Zakona

Fehrat Bradarić je izjavio da onaj ko donosi zakon je taj ko i tumači u ovom slučaju Federalno Ministarstvo tumači Zakon o odluci 2014. godine donesene. Što se tiče uslova koje treba da ispune ugostiteljski objekti. a to je da imaju mjerač decimela, ugrađen stroj, mjerenje buke, izvođač je taj koji treba da zna da li ima ugrađeno jer ako nema da se ugradi.

Senad Suljaković je izjavio da ako nema ispunjene uslove za držanje muzike da će ih rado ispuniti.

Velid Čosić također jedan od prestavnika Službe za privredu, finansije i razvoj poduzetništva je istako da se izmijeni ili ukine, briše član 28 ili da se rad ugostiteljskih objekata uz korištenje muzike uživo reguliše posebnom Odlukom o radnom vremenu u određenim djelatnostima na području Općine Maglaj u skladu sa Zakonom Ugostiteljske djelatnosti, Zakon o Unutrašnjoj trgovini i Zakonom o Obrtu i srodnim djelatnostima a koju donosi Nadležan općinski organ a usvaja Općinsko vijeće.

Dejan Musaefendić je rekao da je njihov stav da se ne gasi muzika i da vikendom mogu da puštaju muziku.

Nakon iznesenih mišljenja prisutnih i datih odgovora na sva postavljena pitanja donesne je konačan

ZAKLJUČAK

Da se na Nacrt Odluke o javnom redu i miru na području Općine Maglaj mogu dati primjedbe i prijedlozi kao i sugestije u roku od sedam dana od dana održane javne rasprave, u pismenoj formi, kao i da se Nacrt Odluke nalazi na web stranici općine Maglaj, odnosno može se izuzeti na info šalteru općine Maglaj.

Sve primjedbe i prijedlozi će biti uvršteni u prijedlog Odluke.

Služba će nakon isteka roka nastaviti dalji postupak oko usvajanja predložene Odluke.

Javna rasprava je završena u 12,00 sati.

ZAPISNIK SAČINILA
Jasminka Saračević, dipl. pravnik

Služba za urbanizam, geodetske
Imovinsko pravne poslove

Broj: 05-23-12- 476/18-2

ZAPISNIK

sa održane javne rasprave na Nacrt Odluke o javnom redu i miru na području Općine Maglaj

Javna rasprava je održana u Sali Općinskog vijeća Maglaj dana **25.04.2018.** godine sa početkom u 11,00 sati.

Pristuni:

- Predstavnici Službe za urbanizam geodetske i imovinsko pravne poslove: Saračević Jasminka, Bubalo Šaban, Merima Mahmutović - komunalni inspektor, predstavnici PS Maglaj Hrnjadović Edhem i Karović Midhat, Krzić Salim ispred Savjeta za bezbjednost građana općine Maglaj, Gorčinović Radovan i Smajlagić Azur.

Javnu raspravu je otvorila Saračević Jasminka Stručni savjetnik u Službi za urbanizam, geodetske i imovinsko pravne poslove, i podsjetila prisutne da je na sjednici Općinskog vijeća održanoj dana 30.01.2018. godine, donesen Zaključak broj 02-05-1-217/18 kojim se usvaja Nacrt Odluke o javnom redu i miru, kao i da se Služba za urbanizam geodetske i imovinsko pravne poslove zadužuje da u roku od 60 dana objavi javnu raspravu po pitanju navedene Odluke, te da se uzmu u obzir sve primjedbe i prijedlozi, sugestije koje će biti uobzirene u prijedlog Odluke.

Nakon toga je upoznala prisutne sa tekstom Nacrta Odluke, odnosno sa značajnijim dijelovima iz Odluke, kao što je član 7. u kojem su navedeni prekršaji javnog reda i mira.

Nakon toga je otvorena javna rasprava.

Predstavnici PS Maglaj su predložili da se uredi kaznene odredbe čl.8. i 9. Nacrta Odluke, te da se izbace iz odluke u čl.7. „stavovi“, a da stoji „tačke“.

Merima Mahmutović - komunalni inspektor je predložila da se uredi preambula Nacrta Odluke, da se pozove na važeće propise, da se utvrdi koji su to teži prekršaji, i da treba uskladiti tačke koje se ponavljaju. Radno vrijeme ugostiteljskih objekata treba uskladiti sa zakonom koji to reguliše.

Salim Krzić predlaže da se uskladi radno vrijeme sa zakonom koji to reguliše kao i sa okruženjem, da se nađe neki kompromis, da se Odluka prečisti i još malo dogradi.

Nakon iznesenih mišljenja prisutnih i datih odgovora na sva postavljena pitanja donesen je konačan

ZAKLJUČAK

Da se na Nacrt Odluke o javnom redu i miru mogu dati primjedbe i prijedlozi kao i sugestije u roku od sedam dana od dana održane javne rasprave, u pismenoj formi, kao i da se Nacrt Odluke nalazi na web stranici općine Maglaj, odnosno može se izuzeti na info šalteru općine Maglaj.

Sve primjedbe i prijedlozi će biti uvršteni u prijedlog Odluke.
Služba će nakon isteka roka nastaviti dalji postupak oko usvajanja predložene Odluke.

Javna rasprava je završena u 18,00 sati.

ZAPISNIK SAČINILA
Jasminka Saračević, dipl. pravnik